

四庫全書

史部

欽定四庫全書

史部
異域錄卷下

欽定四庫全書

史部十一

異域錄

地理類十

外紀之屬

提要

臣等謹按異域錄二卷

國朝圖理琛撰圖理琛姓阿顏覺羅氏先世葉赫人由考取內閣中書官至兵部職方司郎中是編乃康熙五十一年五月圖理琛以原任內閣侍讀奉

命出使土爾扈特由喀爾喀越俄羅斯國至其地五十四年三月回京師復

命因述其道里山川民風物產以及應對禮儀恭呈御覽冠以輿圖次隨日紀載見聞其體例畧如宋人行記但宋人行記以日月為綱而地理附見此則以地里為綱而日月附見所載大聚落皆為自古輿記所不載亦自古使節所未經如史記述匈奴北海頗作疑詞故儒者類言

無北海今據圖理琛所記知伊聶謝相興距
北海大洋一月餘程又唐書稱薛延陀夜不
甚暗猶可博奕僅得之於傳聞圖里琛以五
月至其地知夏至前後確有是事皆我

聖祖仁皇帝德化覃敷

威棱震疊故輅車所至莫不具郵傳供芻糈涉越三
四萬里如行閭閻故得以從容遊覽見所未
見聞所未聞纂述成編以補亘古黃圖所未

悉今備錄其文使天下萬世知

聖化彌綸迴出於章亥所步之外且所載俄羅斯土
爾扈特畏懷恭順之忱尤足見

堯天丕冒砥屬無垠凡在方趾圓顙無不鱗集仰流
效誠恐後為三五以來所未有今土爾扈特
已全部內附而所記俄羅斯南路十四國乾
隆己亥以後又已盡入版圖併以見

武烈

文謨顯承啟佑所由拓億禩之丕基者非偶然也乾

隆四十六年十二月恭校上

總纂官

臣

紀昀

臣

陸錫熊

臣

孫士毅

臣

費

墀


總校官 臣 陸 費 墀

欽定四庫全書

四


提要

異域錄輿圖



異域錄

大元國



欽定四庫全書

異域錄卷上

覺羅圖理琛撰

原任內閣侍讀調補兵部員外郎又

特恩陞授職方司郎中圖理琛本葉赫人阿顏覺羅氏
始祖在葉赫國時行高望重其國主待以賓禮東
北方乃龍騰鳳翔之地

天命屬與

大清而

大聖人出焉統馭寰區撫乂六合於未定鼎之前緣

盛京諸部落人民酋長輸誠向化歸仁恐後之際遽

沾

高厚深恩世受

國祿官誥相承余生於康熙丁未歲少時家貧質弱多

病稍長雖習讀清漢不甚通曉緒譯平平由例監

廷試選取繙繹綱目越一載考授內閣撰文中書舍

人歷俸十載之餘奉

命散賑山陝兩省饑民察看南河監製綿甲頒賜

詔書較俸陞授中書科掌印中書舍人引

見之日適值內閣票簽侍讀缺出閣臣保題

恩准從優陞授內閣侍讀又奉

命監督蕪關稅課差竣旋都未幾授管理禮部牛羊羣

事務總管才識庸劣不能仰副我

皇上揀用深恩譴責罷斥於是退居林麓躬事隴畝承

歡膝下七載有餘期保天年秉化歸盡生際
盛世值遣使海外絕域土爾扈特國鉅典因感戴
國恩仰圖報効具呈叩請遴選引

見

聖德廣運咸沐生成復蒙

聖恩俯賜原官品級優加賞賚

特命前往於康熙五十一年四月二十二日恭請

聖訓奉

旨爾等到彼問阿玉奇無恙欲將貝子阿拉布珠兒遣

回與爾完聚調阿拉布珠兒人來問俄羅斯國商人

科密薩爾

官名

正在料理遣發恰合朕意伊竭誠差薩

穆坦等請安進貢朕甚嘉憫特選厄魯特舒哥米斯

及我等各項人前來頒發諭旨並賜恩賞至于阿拉

布珠兒歸路業遣侍衛祁里德前往策旺拉布坦處

計議尚未到來如到時移會爾等彼若言欲會同夾

攻相圖策旺拉布坦爾等斷不可應允但言策旺拉

布坦與大皇帝甚是相得不時遣使請安入覲大皇帝亦時加恩賜雖其勢力單弱窮迫已極我聖主斷不征伐此事甚大我等未便相允爾雖將此事奏請聖上以我等思之我皇上但願天下生靈各享昇平斷無搖撼策旺拉布坦之意此事我等可保爾等往見阿玉奇亦照見策旺拉布坦禮相待如有餽送爾等酌量收受至往返之時俄羅斯國察罕汗倘遣使欲會爾等即往相會或俱往相會或著幾人見聽其

來言著納顏圖理琛並新滿洲二人去見若彼不欲
見不使人來請則已至相見禮儀依彼國禮見之可
也更須向其使言從前爾國尼果賴名人到中國時行
止悖戾我等斷不若此見察罕汗時如問中國何所
尊尚但言我國皆以忠孝仁義信為主崇重尊行治
國守身俱以此為根本雖利害當前亦固守此數者
寧死弗憚不渝其道即今人各有祭祀禱祝之事然
身不行善不以忠孝仁義信為根本雖祈禱何益我

國威以忠孝仁義信為根本崇尚尊行所以我國無
干戈無重刑安享太平已久如問生計爾等但言隨
處皆同富者亦有貧者亦有且數年前聞得俄羅斯
國與其隣國不睦互相攻伐俄羅斯國欲調用邊兵
或疑我邊人不行調撥亦未可定兩國和議年久朕
無他意有調用邊兵之處即行調撥不必疑惑等情
特諭黑龍江將軍由泥布楚城移會爾國如問年高
之人爾等即告以我皇帝每歲查取年高之人每次

查得一百餘歲者二十人九十餘歲者或一省有
萬餘人俱加恩賜如問出獵行幸之處爾等即告以
我皇帝每歲出獵其所扈從兵丁俱給與官養馬匹
乘騎按日給與盤費今日下令明日起行不致些毫
遲悞一應用度俱係官給惟隻身効力毫無拮据即
我等此役乘騎用度皆係皇上恩賜我等但隻身効
力耳朕思俄羅斯國必言及火炮之類倘若懇求爾
等言路途遙遠難於行走沿途皆高山峻嶺林木叢

數險隘之處甚多我中國並無如此地方亦不曾見
如此道路致之甚難且中國法禁凡火器物件不許
擅自出境法今森嚴雖我皇上恩賜斷難至此伊若
求爾等轉奏爾等只言我等俱係特遣往土爾扈特
國阿玉奇汗處去奉使之事各異此等情節難於奏
聞至俄羅斯國習尚矜誇必出陳其所有之物以示
爾等倘若出視爾等不可驚訝亦不可輕藐但言此
等物件我中國或有或無我等職司各異有我所見

而衆未見者亦有衆見而我未見者所以不能盡知
此役爾等同心合意而行不可飲酒無狀嚴禁隨後
沿途以至俄羅斯國地方風俗甚壞婦女不端者多
爾等隨役不可無禮妄行須嚴加約束至俄羅斯國
地方或見婦人或遇可哂之事爾等須莊重行事不
可輕於戲謔若餽送爾等物件毋遽收受必須再三却辭
但言我等不曾帶得佳品送察罕汗汗所餽遺如何
收得倘再三懇乞或止收一二將爾等帶去錦緞回

送察罕汗但言路途遙遠不曾帶得佳物此係相見之微儀若不來請見或差人到時即將所帶錦緞給與亦言路遠並無佳品此須薄物聊表微意耳及俄羅斯國法令嚴峻屬下人役少有過愆不可表暴於管轄之人務必寬裕莊重而行若問爾等係何官職但言我等係外部院衙門所司官員並非皇上侍近之臣此役俄羅斯國人民生計地理形勢亦須留意欽此內閣編換頒發阿玉奇汗

勅書已成支取驛馬護送兵丁於壬辰年五月二十日
自京師起程是日老父率諸兄弟並親友出城餞
送不忍遽離在北極寺久坐將暮不能遠去宿於
沙河行六日出張家口於六月初二日越興安嶺
至正黃旗察哈兒哈穆虎地方察哈兒蒙古官兵
預備駝馬毡帳供給羊隻迎接自此處將內地所
乘驛馬並護送綠旗兵丁俱發回又行十餘日至
喀爾喀阿拉布坦王所屬巴顏布拉克地方喀爾

喀官兵預備駝馬並供給羊隻迎接此處係興安
之上有一帶石山產金桃皮樹又行二日至西拉
布里度地方有十餘里沙岡十六日至瀚海之南
界阿爾爾哈林圖枯布爾地方十七日至瀚海達中
朱爾輝地方此處產各色小石有查克木樹叢生
其木高五尺許皮似破木葉似三春柳質甚堅其地方有流泉二三處流
聚成小潭水清而甘有水禽集其中觀此忘其為
瀚海而目為內地焉十八日至澗海之北界哈囊

布拉克地方又行三四日至那拉忒赤勞地方其地皆曠野四望無際惟此有山一處甚奇異週圍十餘里其山之石蜿蜒層疊形如盤蛇猶人力為之者山之下有流泉其南十里許爲那斯太地方產黑白二種英石余見而愛之忘其馱載重累擇其佳者十餘塊置布袋內交付台吉萬舒克收貯又行三日至達布蘇台地方貝勒旺扎爾迎接請皇上起居設幃帳宰牛羊筵宴觀隨往新滿洲步射送

十餘里辭歸又行三日地勢漸下七月初三日自
鄂什欣布里度地方下興安嶺北界至汗山東邊
枯爾布里度地方其東南二十里許即勦滅逆賊
噶爾丹之台磨多地方在大路傍俱平坂小山谷
中樹木叢生有小溪沿山麓川谷紆迴而流初五
日至土喇河岸因連朝陰雨河水泛漲既無舟楫
難于涉渡俟水勢稍落駐宿三日於駐宿無事之
暇往釣河濱獲樺魚鱒魚十數尾皆二尺許命烹

之以飼衆極其肥美又遣噶扎爾圖往汗山用鳥
鎗捕得大鹿一隻分而食之土喇河自根特山右
發源向西流入杭愛汗山流出之鄂爾渾河根特
山之左流出之河名曰黑魯倫向東流入呼倫湖
自呼倫湖流出之河名曰額爾古納向東北流入
黑龍江其鄂爾渾河環流哲布尊丹木巴呼圖克
圖所居之布隆汗山及圖謝土汗游牧地方向西
北流入色楞格河自此而北以至俄羅斯國界皆

山土喇河北岸諸山有色爾畢谷口三處及松吉
納山嶺三處有極高危險之處亦有峯巒聳峻之
處谷內之草暢茂野卉爛漫鋪地如畫鮮耀奪目
其山之陰皆叢林有杉松馬尾松楊桦樹極其森
鬱其間自各山發源流入土喇鄂爾渾色楞格河
之小河則有博羅哈拉席喇伊魯爾伊邦等河其
水清而溜急兩岸皆叢柳產樺鱸鯉鯽魚等魚
又行十日至喀爾喀之北界車陵扎布部長之邊

界博拉地方兩傍皆山鄂爾渾河來自東南向西
流入色楞格河色楞格河來自西南環繞山北向東
北流過俄羅斯國界之楚庫栢興又向北流入栢
海見湖其博拉地方皆草墩甚泥濘潦水成澤其
東南林木森密望之鬱然多蚊虻賴嚮導指引而
行又行一日至兩國接壤之蘇布克圖地方兩傍
皆山林谷中有溪河北山之上有泉其水甘而涼
谷內之草暢茂蚊虻甚多揮之不暇跟役人等片

時被喂面目皆腫又越二宿於二十三日至楚庫
柏興相近色楞格河之南岸駐扎管理楚庫柏興
俄羅斯官衣宛薩委翅名差人問曰爾等係何人
往何處去我等回言是中國

至聖太皇帝欽差天使前往土爾扈特國阿玉奇汗處
頒發諭旨並蒙

恩賞賜我等凡我等所來情由爾國之貿易商人科密
薩爾儘知爾頭目問他即便得知于是衣宛薩委

翅即遣官兵撥船隻迎接至楚庫柏興將到時

諭旨前排列十數對兵丁引導送至公署安歇後衣冠
薩委翅來見問曰天使之來有河事故有干我國
之事否我等答曰我等係特差前往土爾扈特國
阿玉奇汗處去的使者於爾國並無甚事因阿玉
奇汗特遣使恭請我

至聖大皇帝萬安進貢方物由爾國經過爾國特差人
轉送至我中國所以我

大皇帝亦由此路差我等前來時我

大皇帝猶恐從爾國經過沿途馬匹供應不能接濟騷

援爾等特宣

旨大臣傳詢爾商人科密薩爾爾科密薩爾云一應馬
匹供應斷不致悞因此方遣我等前來衣宛薩委
翅曰我國人每年往中國貿易屢蒙

至聖大皇帝深恩天使此來一切馬匹供應宜有遲悞
之理但天使前來情由業已差人報知我國察罕

汗至今回信未至我等未奉我汗之言不敢擅令
天使前往只得暫駐俟我察罕汗信到方可前往
因此在楚庫柏興地方俟察罕汗信一住五箇月
零三日其間衣宛薩委翅甚是欽敬不時備宴延
請餽送食物給與緞四匹五十二年往京師貿易
之科密薩爾哦佛那斯夜委翅人名至楚庫柏興于
我四人處各送白狐皮三十張並菜品等物我等
言來時蒙我

大皇帝恩賜一切所用什物俱已全備並無缺乏爾科
密薩爾亦係行路之人何勞如此餽送璧辭科密
薩爾遣人復懇曰我等不時往中國貿易屢沾

至聖大皇帝深恩有年天使並不曾到我國地方今既
幸遇雖盡心恭奉猶為不足伏乞辱納再三懇乞
我等言科密薩爾既如此說將食物收受其狐皮
發回告爾科密薩爾我中國向來凡奉

君命差遣人員一切禮物毫不敢受我等日後相見處

甚多彼時各自盡心亦未為晚目下毫不敢受却

其狐皮答以菓餅五十二年正月十四日察罕汗

信到厄爾口城頭目費多爾衣宛薩委翅

名人

差伊

俄羅斯官按疊列衣宛薩委翅

名人

前來迎接問

其來歷答曰因托波兒搃管噶噶林

姓

移會厄爾

口城頭目所以我頭目差我前來迎接

至聖大皇帝天使令我用心敬奉不可輕慢來文我不

曾見其中情由不能得知于是楚庫柏興官衣宛

薩委翅撥給拖床七十餘輛並跟隨兵丁

勅書前排列伊國旂幟兵丁引導擗鼓放炮相送于正
月十六日自楚庫柏興起程

楚庫柏興

係俄羅斯國界相隔我國喀爾喀部長台吉車
陵扎布之邊界博拉地方二百餘里其間皆山
不甚大沿途皆林藪惟有杉松樺樹而已色楞
格河寬四五十丈不等水清溜急自西南向東

北而流楚庫河來自東南流至栢興之南十里
外歸入色楞格河沿岸皆叢柳櫻桃榆樹二河
交匯處有俄羅斯收貯貨物倉房十餘間居舍
數間皆樓房用大木營治河內有船二十餘隻
其船頭聳尾齊寬丈餘長七八丈不等自二河
交匯處以北十里外色楞格河之東岸有大木
營治樓房百餘間無城垣四面皆山此處俄羅
斯與蒙古人等二百餘戶相雜散處有天主堂

三座小舟艇數百隻設管轄栢興頭目一員駐
兵二百名

器用有床桌橈車拖床

畜駝馬牛羊犬鷄猫

種大麥小麥蕎麥油麥有兩種蘿蔔蔓菁白菜
葱蒜

山中有熊狼野猪鹿狍黃羊狐狸灰鼠白兔河
內有鮎魚鰭鱈魚哈打拉魚他庫魚鯉魚石斑

魚穆舒兒呼魚鯽魚松阿打魚禪魚勾深魚牙
魯魚

一種魚俄羅斯呼為鄂莫裏大似牙魯長尺餘
於白露後五日內由栢海兒湖逆流而來甚多
俄羅斯國人各行海捕醃以度臘鰭鱸以此魚
為食相繼而來其色楞格河於十月中旬始凍
途中行二日於十八日至烏的栢興管栢興官排
兵列幟迎接訖設宴款待深加欽敬出其妻子獻

酒作伊國之音樂跳躍以為娛

烏的栢興

在楚庫栢興之東北相去二百餘里山高大多
林藪色楞格河邊寬濶之處間有田畝色楞格
河自西南流過栢興相西北而流烏的河自東
南來於栢興之西逶流歸入色楞格河四面皆
山無城垣此處俄羅斯與蒙古人等二百餘戶
雜處駐兵二百名設管轄栢興頭目一員有天

主堂二座其盧舍生計牲畜與焚庫栢興同
一種石片其大如掌層疊而生人皆按層揭取
而用視其所揭石片薄而透明似玻璃琉璃之
類俄羅斯國人所居盧舍之窓牖皆以此石片
合釘為之問其所出言有一費提穆河自根特
汗山之陰流出由巴爾古西穆城之東繞過昂
噶拉河源歸入朱爾克河其沿河山內產此石
片莫斯科窪城托波兒等處皆用此石

又越三宿於二十一日至栢海兒湖之南岸博索爾斯科地方沿途皆大山林藪路傍俱田畝此間有則陽海及哈拉果兒兩村落皆俄羅斯居住不甚稠密其栢海兒湖週圍諸山連續四面菁蔥嵐氛杳靄林木蒼鬱波浪浩瀚極目無際

栢海兒湖

自烏的栢興向西北行三百餘里方至沿途皆大山林藪其間有小栢興六七處間有田畝栢

海兒湖南北有百餘里不等東西有千餘里四面皆山色楞格河自西南流入其巴爾古西穆河自東南流入從東北流入又有一河名曰昂噶拉河鄂遼漢洲居北海兒湖內之東北濶五十餘里長二百餘里其洲上有山岡產杉松榆樹叢柳並各種野獸布拉特蒙古五十餘戶遊牧于此畜牛羊馬匹栢海兒湖內產各種魚及獺于十二月下旬水始結實人方行走三月

盡冰始解柘海兜湖之西北流出一河亦名曰
昂噶拉河向西北而流兩岸皆大山林藪約行
五十餘里皆山岡川谷寬濶

二十二日至柘海兜湖之北岸果落烏斯那地方
又越三宿於二十五日至厄爾口城其頭目排列
旂幟鳥鎗鼓吹而迎鋪設公署款留安歇即欲起
程費多爾衣宛薩委翅曰我國總管噶噶林來文
只教將天使等接來此處居住總管之言如此我

不敢少違俟托波兒處特差迎接官員到日方可
起行於是因候迎接官到駐扎厄爾口城費多爾
衣宛薩委翅備宴延請於官給之外又送牛豕我
等言爾國察罕汗供給之物甚是豐裕不可勝用
頭目又何必如此餽送却之費多爾衣宛薩委翅
曰自兩國和議以來我國人民蒙

至聖大皇帝恩澤甚多天使從未一至今遠降敕諭並
無佳品可獻此些微之物乃奉敬天使微忱念我

國察罕汗望乞停留再三懇求遂俱受之酬緞二
疋厄爾口城頭目不時邀請會同射的每遇天氣
晴朗之時即出城外騎射捕魚以適懷二月二十
二日托波兒寔噶噶林差迎接官博爾果付泥克
官名四鐵班訥委翅名人至即欲起程博爾果付泥克
曰今河水未泮舟不能行陸路泥陷人烟斷絕一
切馬匹供用難於置辦斷不可行我等言奉

君命差使宜憚勞苦況我中國凡奉差人員俱以急速

為務我等在楚庫栢興地方已住五月有餘在此
又久候爾等今爾已到即可起行若途中不得供
用之物即於此處攜帶乾糧可食倘不得馬匹雖
步行幾日亦可只管久住非行路之計於我中國
之例甚屬不便博爾果付泥克曰我國總管噶噶
林分付將天使大人由水路接來須深加欽敬不
可少有怠忽怎敢違拗稍有違拂我身首難保于
是住厄爾口城候昂噶拉河水解一日博爾果付

泥克四鐵班訥委翅來見問中國

至聖大皇帝建都中華幅輳遼闊四面皆有人民週圍
國度甚多我俄羅斯國偏僻一方止兩面有國度
爾中國何以無干戈之事極其奠安我國戰爭之
事總無休息此係何故我等答曰我

大皇帝聖德廣運愛民如子凡有血氣者俾皆得生計
不分內外遠近一視同仁遍施恩德好生如天無
重刑不嗜殺繼絕世舉廢國膏澤洽於海外所以

天下諸國皆感仰我

至聖大皇帝深恩心悅誠服是以永無征伐之事常享
昇平之福已久博爾果付泥克曰然我俄羅斯國
風俗殊異務虛好勝所以兵甲無休息之日至今
戰爭不已三月二十五日昂噶拉河水解我等催
促起程費多果衣宛薩委翅及博爾果付泥克四
鐵班訥委翅曰自此往托波兒去向西北行此處
冰雖稍解自此以北尚未全泮現今斷難起行我

國地方我等切知如可行時何敢耽悞四月十五日修葺船隻起至月盡完備撥給船四隻排兵列幟鳴炮放鎗鼓吹而送於五月初四日自厄爾口城起程

厄爾口城

在北海兜湖之西北相去一百五十餘里沿途及附近厄爾口城之山不甚大皆半坂山岡昂噶拉河來自東南繞過厄爾口城西向西北而

流厄爾口河來自西南入昂噶拉河無城垣似
栢興居住八百餘戶皆樓房俱係大木營治大
半俄羅斯蒙古人少有天主堂五座有市廛厄
爾口城及附近小栢興地方皆屬厄爾口城之
頭目斯多爾尼科官名宛薩委翅統轄駐兵五
百名

器用有床桌椅櫬車拖床船舟艇水磨

樂有鼓鐘木笛哨吶銅絃箏胡琴

產紵麻布燠牛皮

種大麥小麥蕎麥油麥麻蘿蔔蔓菁白菜葱蒜
畜馬牛羊豕鷄鴨犬猫

食方木井水

河內產各種魚

三月下旬雪始化盡昂噶拉河水始解四月上
旬栢梅兒湖水始解草始萌樹始發

自此乘舟起程由昂噶拉河過破落克西費喇諸

危險之處其昂噶拉河兩岸奇巖絕壁疊翠橫空
斷岸千尺水聲淙淙巉石嵯峨橫波峭立風高浪
激奔注如矢

昂噶拉河

自栢海兒湖流出向西北遶過厄爾口城仍向
西北而流匯於伊聶謝河歸入北海水清溜急
大於色楞格河兩岸皆山有高峻峯巒亦有平
坂山岡多林藪有杉松馬尾松楊樺櫻菓刺玫

岸有叢柳行千餘里水漸濁厄爾口河自厄爾口城之處歸入又行一千九百餘里伊里穆河自東北歸入自伊里穆河歸入之處以至伊聶謝河其間之河俄羅斯又呼為通古斯科河除厄爾口河伊里穆河又有十餘小河皆歸入昂噶拉河昂噶拉河內有碑克五處破落克八處西費喇九處河內高峯及臨水懸崖俄羅斯人名之曰碑克河兩邊皆峭壁中有大石水直陡

下流者俄羅斯人名之曰破落克水淺有石水
緊溜急之處俄羅斯人名之曰西費喇五月初
四日自厄爾口城乘船起程沿途河岸之下未
消之冰雪尚有二三尺不等亦有至丈餘之處
順流晝夜行十九日至伊聶謝栢興地方其間
水程三千餘里沿途河岸寬濶之處間有田畝
其山陂少平之處亦有耕種者有小栢興甚稀
俄羅斯與布喇特及索倫人等雜處

五碑克之名

滅提別西克碑克巴達爾滿斯克碑克多達爾
斯克碑克滅費斯克碑克費達穆斯克碑克

八破落克之名

博合滅爾訥破落克皮牙乃破落克巴敦破落
克多爾規破落克沙渴斯克破落克阿布林斯
克破落克木爾蘇斯克破落克四鐵烈洛什破
落克

九西費喇之名

鄂標穆索斯奈西費喇洛什西費喇栢格西費
喇郭洛活瓦西費喇郭費殷斯克西費喇噶什
那西費喇鄂費夏那西費喇鄂爾吉那西費喇郭
薩牙西費喇

由昂噶拉河水行十九日於五月二十三日至伊
聶謝栢興地方管栢興官阿列克散忒爾色敏訥
委翅人排兵列幟鳴炮放鎗鼓吹迎接自此前往

有陸路三日因馬匹未齊住候五日管栢興官阿
列克散忒爾色敏訥委翅來見遂請筵宴於我四
人處各送貂皮二張白狐皮十張及猪酒俱却不受
阿列克散忒爾色敏訥委翅曰中國之人自古未
到我國地方今幸遇中國

至聖大皇帝遣天使大人至此不知作何敬奉欽敬之
心甚切但不得美品此係我一點微誠敬儀望乞
辱納我等言俱各蒙

至聖大皇帝恩賜而來一應用度之物俱已全備途中
有察罕汗供給等項用之不竭頭目所餽禮物理
宜相受但我國凡奉

君命差遣一切餽送禮物毫不敢受因其遣人再三懇
乞只留猪酒却其貂狐皮張酬緞四疋二十九日
撥給馬匹自伊聶謝栢興地方起程亦排兵列幟
鳴炮鼓吹而送

伊聶謝栢興

在厄爾口城之西北其間水程三千餘里陸路
一月程川谷寬濶四面皆山岡伊聶謝河自南
流來大於昂噶拉河其昂噶拉河來自東南離
栢興十餘里歸入伊聶謝河又遶過栢興向東
北流入北海無城郭居住千有餘戶俱俄羅斯
有天主堂八座有市廛設管轄栢興頭目一員
斯多爾尼科阿列克散忒爾色敏訥委翅駐兵
八百名其居住廬舍生計種植牲畜等項與厄

爾口城同俄羅斯呼索倫為喀穆尼漢又呼為
通古斯俱畜鹿以供乘馭載其鹿灰白色形
似驢騾有角名曰俄倫林藪之內有鷓鴣

北地最寒有一種獸行地內遇陽氣即死身大
重萬斤骨色甚白潤類象牙質柔不甚傷損每
於河濱土內得之俄羅斯獲其骨製碗碟梳篦
用之肉性最寒人食之可除煩熱梵名麻門索
窟華名磤鼠此地相去北海大洋一月程時夏

至前後夜不甚暗雖日落夜深猶可博奕不數刻東方即曙而日出矣

因候辦供給住二日脩辦馬匹停妥行李載於車內官兵護送過麻科佛斯科嶺途中住一宿于閏五月初二日至麻科斯科村落之揭的河岸駐扎麻科佛斯科嶺在伊聶謝西北二十里外烏斯乞木地方下船陸行山不甚大沿途俱林藪有果松馬尾松杉松楊桦柳櫻蓂刺玫地甚泥濘多蚊虻

其間有小栢興兩三處溪河四五道產熊狼堪達
韓狐狸銀鼠灰鼠

麻科斯科

在伊聶謝之西北相去二百五十餘里皆山路
揭的河來自東南遶過麻科斯科向西北而流
栢興內有廬舍四十餘間俱俄羅斯居住有天
主堂一座其河內有寬一丈長七丈許船二十
餘隻舟艇甚多由水路之人俱於此處登舟赴

托波兒城

在揭的河岸駐扎候彼預脩船隻供給之時伊里
穆城頭目喇法斂帖名帶領被擄西洋將軍牙那
爾等來謁見我等衣冠用度齊楚不勝仰慕叩頭
獻酒而去初五日一切船隻供給完脩自揭河登
舟起行

揭的河

自麻科佛斯科佛落克嶺發源環流麻科斯科

向西北而流至那里穆柏興附近歸入鄂布河
寬六七丈不等多灣曲水色赤蚊虻甚多沿河
有小柏與四五處俱俄僱斯居住其地平坦水
窪處甚多皆林藪有馬尾松果松杉松楊樺柳
櫻英刺玫河崖下土燕之巢穴甚多產熊貂鼠
狐狸銀鼠灰鼠

有一種人類乎索倫名曰鄂斯提牙斯科在揭
的河兩岸林木內散處捕貂作貢順流無晝夜

行十一日河面遂寬林木漸稀河內水色漸白
蚊虻亦少再行一日至那里穆柏興揭的河歸
入鄂布河其間水程二千五百餘里

一種魚形類鯪魚口似鮠無鱗脊上並兩肋有
骨三條連生肉味同于鮠魚大者不過三尺俄
羅斯名之曰四帖里烈帖蒙古人名之曰舒里
於未凍河之前從北海由鄂布河遡流而來甚
多人皆漁捕曝乾為食亦貨賣

自麻科斯科村登舟由揭的河順流而行此間經
羅新訥牙爾及茄斯科村落出揭的河入鄂布河
行一日於十六日至那里穆柏興管柏興官雅果
付公排列旂幟兵丁迎接請至伊家作樂筵宴因
將京都帶去果品並粳米老米遣人酬送管柏興
官父子甚喜叩頭致謝起程之日送十餘里辭歸
河內水面白絨甚多或飛樹上或浮水面似柳絮
乘風楊花鋪地

那里穆柏興

在麻科斯科之西北其間水程二千五百餘里
鄂布河自南流來過柏興向西北而流大於伊
聶謝河揭的河來自東南流至柏興附近歸入
鄂布河居住四五十戶俱俄羅斯有天主堂二
座設管轄柏興頭目一員名雅果付衣宛薩委
翅無兵

從此處由鄂布河順流而下行五日於二十四日

至蘇爾呼忒柏興起程之次日忽颶風大作波濤
洶湧舟楫傾欹上下浮沉俄羅斯人操舟不似中
國人諳練幾至於危殆倖得傍岸避入小河衆心
始安去柏興尚遠管柏興官出迎請至伊宅設宴
款待出十數活銀鼠視之鼓西洋琴以獻蘇爾呼
忒廬舍回祿尚未修葺無可歇公署居舟中越二
宿於二十七日自蘇爾呼忒起程管柏興官駕舟
遠送辭歸順流乘風揚帆而行兩日行六百餘里

於二十九日至薩馬爾斯科

蘇爾呼忒柏興

在那里穆柏興之西北其間由鄂布河舟行水程一千四百餘里其鄂布河來自東南流過柏興向西南與厄爾齊斯河合流復向西北流入北海大于伊聶謝河水濁溜緩水漲四溢洲渚甚多沿河兩岸地勢平坦皆林木有杉松楊樺櫻莫河邊多叢柳有一種鄂斯提牙斯科人在

林內散處河之北岸向有栢興廬舍居二百餘
戶天主堂三座因失火燒毀少半新結廬舍居
住餘皆穴處俱俄羅斯設管轄栢興頭目一員
駐兵百名

至薩馬爾斯科之日管栢興官濟爾果爾

人遠來

迎接請至伊家款宴出其妻子獻酒又請會同射
的六月十六日差俄羅斯人往托波兒城通報大
國使臣已到緣由自此處由厄爾齊斯河遡流而

行俱塔塔拉之人挽繹越六宿于二十二日至狄
穆演斯科

薩馬爾斯科

在蘇爾呼忒柏興西南其間水程六百餘里厄
爾齊斯河自南流來遶過柏興向西北流二十
餘里歸入鄂布河其河東岸之上有土山不甚
大有杉松楊樹河邊有叢柳山麓一帶有廬舍
百餘間居五十餘戶皆俄羅斯有天主堂一座

設管理驛站船隻頭目一員無兵以上三處林木甚多係水窪地方無耕種田畝俱從托波兒托穆斯科等處挽運麥石而食其廬舍生計牲畜等項與厄爾口城伊聶謝柏興同

在狄穆演斯科修理船舵損壞之處並俟供給止二宿閒暇時管柏興官濟爾果爾相約射的為娛二十五日濟爾果爾乘船相伴同赴托波兒城

狄穆演斯科

在薩馬爾斯科之西南由厄爾齊斯河遡流而上相去六百餘里厄爾齊斯河來自西南向東北而流水濁溜急其大如色楞格河自薩馬爾斯科至狄穆演斯科沿河一帶東岸之上皆土山平坂有杉松楊樺櫻菓等樹甚密河邊皆叢柳兩岸有小柏興十餘處間有田畝俄羅斯與鄂斯提牙斯科並搭搭拉人雜處其河東岸土山之上廬舍百餘間居五十餘戶皆俄羅斯

柏興之四面皆田畝有天主堂一座其柏興事務係薩爾馬斯科頭目兼管無兵

一種草果俄羅斯名之曰馬里那蒙古人名之曰和尼柏兒濟爾根形似桑椹色赤味甘酸幹不盈尺其厄爾齊斯河岸之山內甚多柏興各處小兒鬻賣

於七月初四日至托波兒地方噶噶林馬提飛費

多爾委翅人名遣所屬俄羅斯官衣宛阿法那西委

翅人迎接問候自河岸至公署排兵列幟

諭旨前排列數對兵丁導引送至公署噶噶林執手叩

請中國

至聖大皇帝萬安於是我等問察罕汗起居互相叙寒
溫坐畢噶噶林曰兩國相和議之後我國人民不
時往中國貿易屢沾

至聖大皇帝深恩有年中國人並不曾一至我國地方
今天使大人此來有何事故或有干預我國之事

我等答曰我

至聖大皇帝其仁如天視萬國猶一家保萬民如赤子
是以普天率土莫不畏威懷德來享來王其遣使
進貢朝覲者甚衆我

大皇帝無論遠近內外俱一體加恩愛恤不止爾俄羅
斯一國我等此來因土爾扈特國阿玉奇汗特遣
使往中國恭請

大皇帝萬安貢進方物之人由爾國經過爾國遣人轉

送至中國所以我

大皇帝勅諭我國大臣傳詢爾國前往貿易之商人科
密薩爾言沿途馬匹供應不致違誤是以我

大皇帝亦由此路遣我等前往阿玉奇汗處

頒發諭旨恩賞於爾國無事但我等來時我大部交付

有俄羅斯國商人科密薩爾乞請行俄羅斯佛教

番僧在京師者止有米提理一人年已老邁倘有

不測則行我俄羅斯佛教之人必致斷絕若准我

國送番僧前來我即送來等語我國大臣轉奏
蒙

大皇帝恩准著送番僧前來又曾交付爾商人科密薩
爾國若有外科良醫一併送來我等事竣還朝時
爾國若將行教番僧外科醫士給發令我等帶去
噶噶林曰是此等情節我科密薩爾俱曾告訴番
僧現今在此預備醫士此處無甚良者已差往莫
斯科窪城調取尚未曾到天使大人回時可以到

此我等言我等奉

至聖大皇帝命路經爾國往土爾扈特國阿玉奇汗處
去我等此來爾國察罕汗可曾聽見否曾差人來
否噶噶林曰天使大人前來之處已報知我國察
罕汗我察罕汗說中國

大皇帝命天使大人特往阿玉奇汗處去爾等須當欽
敬護送至阿玉奇汗處一應馬匹供用不可遲悞
但未曾遣人來我察罕汗不在莫斯科窪城現在

軍前天使大人回來時我察罕汗欲會天使大人亦未可定若欲相會自當特遣人來不知天使大人去否我等答曰來時奉

大皇帝諭旨兩國和議已久爾等過俄羅斯國地方往阿玉奇汗處去若去來之際察罕汗得知差人邀會詢問地理情形爾等分一半人往察罕汗處去一半人往阿玉奇汗處去若請爾等全去即著前往及爾國商人科密薩爾在京師時亦曾有

諭旨爾國人民雖每歲前來貿易俱係平素商賈察罕
汗並未特遣人進貢所以朕亦不曾遣使此所遣
使者是往阿玉奇汗處去的爾察罕汗如欲相會
詢問地理情形著其中一半人前往相見噶噶林
曰如此天使大人可曾帶得印文來否我察罕汗
欲會天使特差人來請亦未可定彼時天使不可
食言我等答曰不曾帶甚文書來爾察罕汗必欲
相會差人前來我等即前往相會有何食言之處

我等向噶噶林言爾國所屬之泥布楚城居住之
庫似克等共十口越境之中國地方伐木打牲被
我巡邏兵役拿獲理應遵定邊界和議之款治罪
我

大皇帝仁慈寬大姑宥其罪其寬免情由曾有文書交
與商人科密薩爾帶來使爾知會爾察罕汗此文
書曾到否噶噶林曰文書已到業已差人稟知我
察罕汗去了其回信尚未曾到我從前在泥布楚

城作頭目時似此等私行越境人亦有割耳鼻者
亦有砍手者大辟者越一日特遣官前來請會於
是前往囑囑林問曰中國

大皇帝天縱至聖國家享承平已久天使大人受

皇帝恩澤享用安逸我等答曰

大皇帝至聖至神以仁孝治天下以忠義勵臣僚國無
重刑不嗜殺戮無間遐邇一體同仁山陬海隅罔
不沾恩被澤薄海人民皆中心感戴所以國家雍

熙雨暘時若人壽年豐宇內咸享昇平之福我等
世戴

大皇帝深恩今幸際盛世不但我等身沐

皇恩受享安逸即舉家老幼妻子無不沾我

大皇帝厚澤安居樂業我

大皇帝聖恩高厚不能枚舉即我等安享樂業之處亦

難殫述噶噶林曰誠然中國

大皇帝至聖至神舉國殷富四方寧謐天使大人等俱

安享樂業聞之已久我先察罕汗在時國家無事
上下相安先察罕汗喜射獵好鷹犬當時臣宰俱
享安逸二十年來我國兵甲之事全無休息至今
猶征戰不但我俄羅斯國觀天下諸國沙漳汗空
科爾汗式費耶忒國厄納特赫國哈薩克國哈拉
哈兒叭國策旺拉布坦阿玉奇等國皆互相爭鬪
獨中國甚至寧謐目今察罕汗幼稚時最喜與兒
童為戰鬪戲從前同戲諸兒今皆作將軍若似乃

父行事我等亦可受享安逸矣爾中國寧謐宇內
無事

大皇帝亦射獵否亦養鷹犬否我等答曰我

至聖大皇帝聖神文武法天行健每於萬幾餘暇古來
經傳史冊無不經覽天文地理律呂數術無不貫
通又天縱神武常親騎射以教習臣庶不時圍獵
獎勵文武而訓練兵將凡扈從士卒俱按日官給
盤費又給與官馬乘騎雖今日下令明早起行亦

無些毫遲誤一應俱係

大皇帝恩賞我等隻身効力毫無拮据

大皇帝亦養海東青鴉虎鷹犬海東青有雪白者有蘆

花者有本色者單放野雞俱係過時捕得無窩雛

惟鷹有窩雛亦有捕得者亦放野雞亦捉走兔犬

內有捉虎狼鹿狍者有捉狐兔者至於水禽雁鴨

俱放鴉虎按時放捉聞爾國有窩雛海青可取來

一觀噶噶林曰我等亦養海青亦係捕捉方得並

無窩雛不知在何處結巢隨將所養本色海青及
一草白犬出視曰天使大人此來河路迢遙最屬
險惡途中勞苦一切馬匹供應可有遲悞否中國
亦有如此河路否我等答曰我中國似此等大河
亦有更有大於此者名為長江我等來時沿途官
員甚是欽敬迎接官博爾果付泥克甚是勤慎爾
國察罕汗供給豐裕不可勝用馬匹船隻並無遲
悞是以我等不勞而至噶噶林曰聞得土爾扈特

國貝子阿拉布珠兒之四人天使大人帶來其阿
拉布珠兒是何人將他四人帶來是何情由我等
答曰阿拉布珠兒係阿玉奇汗之姪十年前同乃
母往西藏謁見達賴喇嘛其間策旺拉布坦與阿
玉奇汗不睦所以阿拉布珠兒不能歸其原籍窮
迫至極故此投往中國我

大皇帝仁育萬方務使天下人民無一夫不得其所
以將阿拉布珠兒封為貝子於嘉峪關外黨色爾

騰地方安置每歲賞給俸銀緞疋生畜今甚殷實
去歲阿玉奇汗特遣使恭請我

至聖大皇帝萬安貢進方物因此遣我等頒發

諭旨並錫恩賞之便將阿拉布珠兒四人帶去見乃父
那哂爾麻木令其知阿拉布珠兒蒙我

大皇帝深恩其身依然無恙耳一日有俄羅斯國官衣
宛阿法那西委翅者來見問曰中國大臣內何等
品級方為尊爵我等答曰我中國親王郡王貝勒

貝子國公俱係室室

天潢一派其公臣子孫有世襲公侯伯者內有領侍衛
內大臣大學士外有尚書都統前鋒統領護軍統
領外省有將軍總督此皆係頭等品級大臣衣冠
阿法那西委翅曰我俄羅斯察罕汗侍近有大臣
四員一應事務不用通知國王即可專擅行事中
國亦有此等臣宰否適間天使大人所言大臣內
何等最尊我等答曰我中國並無如此專擅行事

之臣宰事無大小皆具題請

旨恭候

上裁臣宰欽遵施行不敢專擅行事大臣內領侍衛內
大臣六位大學士六位最尊無過於此者衣宛阿
法那西委翅曰我俄羅斯國若有大事會議我汗
亦前往公同會議中國有事會議

大皇帝亦往同議否我等答曰國家倘有議政要務有
王貝勒大臣會同議定奏

聞皆聽

皇上裁奪我國

大皇帝無前往同議之理衣宛阿法那西委翅曰天使大人看來我國噶噶林於中國何等臣宰相似我等言看來類同我中國尚書總督衣宛阿法那西委翅曰我國之噶噶林與中國領侍衛內大臣相似嗣後天使大人將噶噶林不可呼為尚書但稱大臣可也欲以緞十二疋差人送與噶噶林有管

待飯食俄羅斯官曰差人餽送於我國禮不合天
使大人親往之時帶去方可我等言此非佳物我
等自中國遠來經過爾噶噶林地方備承厚意故
以此相酬我中國凡以物與人並無親送之理今
差人餽送於爾國禮不合若我等親身帶去又於
我中國之禮有礙以此微物豈可壞兩國大體不
如停止遂公議停止餽送以俄羅斯官博爾果付
泥克遠接勞苦給與緞四疋又給與博爾果付泥

克之副員費耶爾索付緞二疋起程前一日噶噶
林差伊俄羅斯官來請曰天使大人明日起行如
蒙不棄今日可來一飯否於是前往噶噶林見余
所帶小刀再三顧盼不勝稱羨即解以贈之噶噶
林免冠拜受起程之日特差伊俄羅斯官答送元
狐皮十張余言爾總管念我係好友如此餽送理
當收受但我並不曾帶得佳物相贈爾總管之物
如何收受謹心領矣遂却之來使遣人回覆噶噶

林復又差人再三叩懇余言我中國凡奉

君命差遣一切物件毫不敢收將皮張拿回向爾總管
為我道謝賜與來使玻璃碗二件在托波兒地方
住八日於十二日自托波兒起程仍派原接俄羅斯
斯官博爾果付泥克四鐵班訥委翅撥護送兵六
十名小心防護送至阿玉奇汗處一併同回又差
伊所屬俄羅斯官等送二十餘里方回
托波兒

在狄穆演斯科之西南其間遡流行六百餘里
厄爾齊斯河來自東南遶過托波兒向東北而
流托波兒河來自西南於托波兒相對地方歸
入厄爾齊斯河沿河兩岸地勢平坦有杉松楊
樺櫻蓂叢柳小栢興五十餘處左近皆田畝托
波兒以北二十餘里河東岸之上有小土山極
平坦無城郭居千餘戶其廬舍皆大木營治有
磚造廟宇二所理事公署木房數間其山麓及

河岸一帶居二千餘戶其廬舍亦皆係大木營
治有市廛天主堂二十餘座駐兵二千餘名有
頭目十數員其西畢爾斯科省城堡及栢興地
方頭目兵丁俱屬噶噶林馬提飛費多爾委翅
統轄

器用有床桌椅櫬車拖床船舟艇

樂有鐘鼓喇叭木笛噴呐銅弦箏胡琴

種大麥蕎麥油麥麻

產蔓菁白菜王瓜芡萎倭瓜葱蒜

畜馬牛羊豬鵝鴨雞犬猫

有一種人俄羅斯名之曰搭搭拉在厄爾齊斯
河沿岸及托波兒並喀山一帶居住詢其來歷
俄羅斯人曰原係庫程汗之人又名貨通其托
波兒等處地方歸併我國之後將伊等散處於
阿兒台山後沿厄爾齊斯河一帶及托波兒並
喀山等地方其中有歸入我教者有不曾歸入

我教者看其未入俄羅斯教之人貌似回子俱削髮戴小帽不食猪肉別供佛像

俄羅斯國地方分為八道俱設立噶噶林馬提飛費多爾委翅等總管八員分轄每道所管城堡十餘處二十餘處不等自托波兒以東至泥布楚地方名曰西畢爾斯科其七道曰喀山斯科曰佛羅尼使斯科曰計由斯科曰司馬連斯科曰三柯忒撒忒爾斯科曰耶羅多阿爾哈連

斯科曰莫斯科窪斯科

於稼穡之人量其收穫之多寡什一而稅於布喇忒索倫鄂斯提牙斯科兀良海齊爾給斯等打牲人令其交納貂鼠狐狸銀鼠灰鼠皮張不打牲之布喇忒索倫等人每歲人各納銀錢二百文其兵丁每歲有食千錢者亦有食七百文者不等錢之外又給與麥麵食鹽衣帽五年一次官給更換

原以千步為一里後改為五百步

其相見禮儀吉凶等事及飲饌生計大約皆同
自厄爾齊斯河向西南入托波兒河遡流越九宿
於二十三日至圖敏途中皆搭搭拉之人挽緯岸
傍林木叢密無緯路俱行泥水之中兩足肌膚破
損血水淋漓俄羅斯兵丁猶加笞楚催促余不忍
視呵責方止到彼之日管栢興官排列旂幟兵丁
迎接請至伊家款宴復餽送食物候供給止宿之

日有俄羅斯出征擄來之式費耶忒國數人來舟
中鼓吹絃歌以為娛賞以銀錢肉食二十五日起
程

鴉班沁

在圖敏之西北由土拉河遡流舟行五百餘里
沿河兩岸有杉松楊樺叢柳甚稀有小栢興二
十餘處栢興附近俱種田畝俄羅斯與搭搭拉
雜處土拉河之西岸有栢興廬舍居二百餘戶

俱俄羅斯有天主堂三座設管轄栢興頭目二員無兵從此捨舟陸行

異域錄卷上